

四庫全書

集部

欽定四庫全書

集部

粵西文載卷四十五

詳校官庶吉士臣瑚圖禮
主事銜臣徐以坤覆勘

總校官庶吉士臣朱 鈺

校對官中書臣牛穎文

謄錄監生臣沈世攷

欽定四庫全書

粵西文載卷四十五

桂林府通判汪森編

碑文

平蠻

平蠻碑

唐韓雲卿

惟大歷十二年桂林象郡之外有西原賊率潘長安稱
安南王誘脇夷蠻連跨州邑鼠伏蟻聚賊害平人南距
雕題文趾西控昆明夜郎北洎黔巫衡湘彌亘萬里人

不鮮甲天子命我隴西縣男昌夔領桂州都督兼御史
中丞持節招討斬首二百餘級擒獲元惡并其下將八
十四人生獻闕下其餘逼逐俘虜二十餘萬並給耕牛
令還舊居統外一十八牧守羈縻反覆歷代不賓皆受
首請罪願為臣妾嘉其自新俾守厥舊商農漁樵各復
其業悼耋鰥寡各安其宅變氛沴為陽照化險阻為夸
途五嶺之人若出玄泉而觀白日如蹈烈火而蒙清泉
書上聞優詔嘉焉公卿百辟將校者艾咸願歌頌勲烈

以銘於石辭曰

皇帝即位十有五載淳風橫流聲教無外蠭茲蠻夸肆
其蜂蠻特遠怙險為人蠭賊爰命龍西持節討綏訓我
師徒如虎如貔卷旗釋甲先喻德澤稔惡勿懲含萬弗
息矯矯隴西勵爾矛鋌鼓奮重泉兵揚九天出其不意
億萬踣顛來者面縛亡者染鍔搜洞索穴覆其巢穴若
鼓洪爐燎彼毛毳若振飄風摧乎朽脆海宇濛濛再開
天光俾祲作和化成為農三軍卧鼓四鄙罷柝原野蕭

條萬里澄廓明主是嘉罷人是康銘之嶺門用垂無疆

桂州瘞宜賊首級碑

宋孔延之

廣西去國既遠自有邊事主兵之臣懷詐事上專用姑
息以取官賞民益受弊賊益得計以至於不可救療慶
曆四年正月十三日宜之環州有賊歐希範挾怨聚黨
攻其州下之明日破帶溪普義又明日破鎮寧逐其官
長因自稱神武定國令公桂牧內倚世賊蒙趕深溝高
壁乘宜州無備將以驅其黨羽肆掠而搖二廣也於時

主者出兵捍禦雖頗攘定而賊方繕完器甲張兵勢勞
安撫納故事四月以刑部員外郎集賢杜公杞為轉運
按察使得便宜追討八月十二日公至自京師涉桂蹠
宜駐旌於環經沉謀揆遠略謂安化種類頻至深入使
吾數千里之氓夫耕婦織不能供命而濱于死者趕寔
為之地今不弁誅是雖得希範猶不得也亦既擒趕明
年正月七日縛希範於荔波之古綰寨十三日械至環
州二十九日誅希範蒙趕及其僞置官屬二百四十有

三人於宜州之城下配隸之外并前斬首總一千四百九十四級公命分送諸郡梟之以示衆而臨桂居四分之一於是桂之官吏相與謀曰古之誅大惡者必為京觀所以示戒懼于其後也今此小醜敢行稱亂惡已鉅矣宜斂而封之以應古誼然後盡以所命即北郊而瘞之章大戮焉公之成功藏在冊府異時死者得葬生者得息含哺鼓腹無征輸之患傳諸故老之口而不見公之顏色又無紀述以形盛德之美何以慰南人之思哉

因略取其粗而著之石云

平蠻京觀誌

余 靖

大宋皇祐四年夏五月廣源州蠻犯邕州陷之乘江流
暴漲東隔九城遂至廣州廣人怯戰登陴自固賊將駐
兵傅城攻之五旬雲梯土山極肆其巧城堅不能下乃
還經途復殘二郡覆四將再入於邕凡害將佐三十餘
員據生口萬計牛畜資寶無算所過焚蕩無餘楚越蕭
然矣朝廷憂之君臣為之旰食樞密副使狄青抗章請

行願授成算上重其誠從之先是命樞密直學士孫沔入內押班石全彬同本路經略使余靖經制賊盜命青以宣徽使都大提舉總其節制明年正月己未青帥三將兵至邕州歸仁舖賊舉衆出城拒戰大敗之騎兵追奔十五里所殺斬衆二千二百餘人僞署侍郎黃師宓等腹心將領五十七人死於陣賊首儂智高其夜焚城自遁詰朝引兵入城俾供奉官賈榮就戰場斂賊屍而殮之為塚于歸仁之南又遣郴縣尉區有鄰聚重傷還

城而死并活擒而戮及奔而蹂踐燔灼者三千二百二十八人為一塚瘞之于城之北三月有詔即其地築為京觀乃命立石以志其伐銘曰

庸臣司邊率職不虔盜起其間蠹爾異類歲亡納叛以輔狡頑窺茲無備乘虛襲急遂肆兇姦順流而東列城皆空嶺表騷然師徒桓桓失勁摧完天下惻然帝命樞臣握節屬鞬拯墜綏殘師行以律賞罰貴必其謀乃專兵家之勢動靜有制所擊無堅吁嗟羣醜狃于常勝敢

當其前驅彼犬羊敵此熊羆血膏于原棄甲如山遺骸
巨野百里腥膻武功外揚仁心內憫念及幽泉肩韁之
葬京觀之封銅柱齊年天聲遠振皇澤重宣永鎮群蠻

平蠻碑

聖宋體天法道欽文聰武聖神孝德皇帝在宥之三十
一年天宇之內海渚之外邇夷卉服罔不率俾越五月
蠻賊僥倖高冠邕州陷其郭賊虐衣冠驅虜稚艾遂沿
鬱江東下所過郡縣素無辟壘倏然寇至吏民棄走因

得焚蕩剽鈔無所畏憚乃攻圍廣州五十餘日不克大掠其民而去然所存者官舍倉庫而已百年生聚異域珍玩掃地無遺矣國家于嶺南不宿重兵故賊起三月而後師集蔣偕張忠素號驍將相繼覆沒由是畏懦者望風潰走賊鋒益熾逼連賀毀昭賓再穴於邕矣驛騎繼聞上甚憂之樞密副使狄公青以為將帥之任古難其才若再命偏裨事一不集則二廣之地禍連而不解矣亟自請行天子聽之遂改宣徽南院使荆湖南北路

宣撫使都大提舉廣南東西路經制盜賊事九月拜命既受禁旅仍啓以舊鎮騎兵及荆湖銳卒從行十二月至桂林督部伍親金鼓然後兵知節制矣明年正月甲辰至賓州先是鈴轄陳曙領兵八千潰于崐崙之關公推其罪首斬曙及佐吏以下三十一人然後人知賞罰矣兵將股慄咸思用命是月己未引師至邕城一舍賊悉其徒以逆戰公之行師雖倉卒道途皆有行列賊至駐先鋒以接之公憑高望搗騎兵以翼焉賊大敗追奔

十五里斬首二千二百餘級生擒五百人尸甲如山積
於道路偽署將相死者五十七人是夕智高焚營自遁
復入於蠻中先是命湖南江西路安撫使樞密直學士
孫沔入內押班石全彬過嶺與廣西經略使余靖同共
經制東西路盜賊故命公督大提舉然孫石贊謀而軍
中悉稟公之節制賊之再據邕也農者輶耕商者輶行
遠邇惶惶不聊其生及公之拜命也朝野之論中外懼
然以方名之才兼機軸之重出剪狂蠻無噍類矣賊之

巢穴曰廣源州交趾之附庸也父為交趾所戮遂棄其州奔南蠻界中悖傲以僭稱號自名其居曰雲南道又曰南天國再名其年曰景瑞曰啓歷雜名其左右之人自侍中開府以下署之其主謀者黃師宓儂廷侯儂志忠等戰沒于陣未有剪其羽翼而能飛剗其腹心而能全者也故宵遁矣嗚呼智高之謀十餘年間招納亡叛共圖舉事十餘月間連破十二郡所向無前夫豈自知破碎奔走在於頃刻之間乃知名將攻取真自有體哉

二月甲戌改乘轍其月丁亥至桂州詔徙護國軍節度
復以樞密副使召仍曲赦嶺南民得休息矣遂磨桂林
之崖石以書其勲其詞曰

有宋之大天覆地載四海正朔百蠻冠帶蠢茲狂寇起
乎徼外父戮於交逃死獠界招納亡命浸淫邊害邊臣
罔上習尚以懈卒陷邕郭乘流東邁志圖全越肆其蜂
薑廣城言言梯衝附焉攻之五旬掠民而旋賊鋒一至
千里無烟還據于邕五嶺騷然天生狄公輔聖推忠情

存義烈志疾頑克請纓即路仗節臨戎英材鱗集猛將
風從賊之敢鬪寔惟天誘來逐于郊奄喪羣醜當我摧
鋒易如拉朽僭補偽署叢然授首羽翼既剪心腹既剗
雖欲再舉人誰與圖焚廬而去回巢以逋六親不保曰
獻其俘厥惟邕邊南國之紀九峒襟帶列成唇齒險固
一失兵糧無峙庶民蚩蚩鳥驚獸岐我公之來電掃雲
開叛蠻斗破綱領重恢師成廟算民得春臺天聲遠振
繫公之材

紀功碑

李曾伯

寶祐戊午朝廷合二廣創制閩命曾伯再收防南鄙也
尋調建康都統制朱廣用領軍來戍於是此諸道戍兵
並委之總統相與修浚城池為保固計是秋寇犯州邑
境賴我師遏之不致深入明年開慶己未築鑿浦竣邊
遽已動七月寇渡烏泥江八月犯橫山九月二十二日
薄我城下幸壁壘具將士用命一鼓而殪賊前鋒遂引
退岩於數十里外我師晝夜攻劫大小十餘捷賊氣頗

沮相持兩旬由間道而湘亟遣兵追襲一捷於黃沙剪其渠魁俘獲甚衆再捷於衡山剿殺幾盡賊不克逞以遁陰山極北之寇犯炎方宅南之境負伺二十年馳騖數萬里擁衆驅蠻而入乃載籍所未有向非桂林砥柱其衝師武臣力敵王所愾廣南亦岌岌甚矣此皆宗社威靈天人祐助億萬載無疆之福也茲制闡結局都統制且徹戍以歸鰲石請紀文武賓校氏名載念逆寇犯順非小變也連年得以固我封守吾民克免瞿難誠同

舟共濟者之力矧蒙烟瘴犯霜露備極勞苦是不可不
紀以示永久非事誇詞也提刑提舉無參謀四明豐蒞
制機左綿文可嗣眉山家寓河內李曾伯制議永嘉鄒
琳制幹清湘管安昌襄陽李湜盱江聶世堅合沙卓年
龍制僉長沙凌炳炎耒江陳彌壽括蒼張建大濟南楊
延九江劉烈清湘趙龠夫廬陵朱埴會稽陳策制帳都
統制長沙朱煥總管峴山彭興浮光余夢發都梁兵正
浮光朱大德壽陽王勝金陵王達金陵陳邦傑浮光張

琦鈴路統制合肥程俊泗水周旺胡梁李慶山陽楊俊
浮光周勝海陵戴俊戎司屬官浮光吳起宗清原羅萬
敬古雲鄭祥

平猺碑

元胡明允

泰定己丑秋僕假守于融倉皇下車瘞曠是懼慮融在
萬山之間民受猺害顧峭壁窮巢茲為重地因甲子冬
寇貴州乙丑春寇柳城夏逾潯寇平南寇藤之赤水頃
之寇鬱林盜開府庫剽掠元寶罪不勝誅故天顏震怒

廷臣愈俞特命資善大夫湖廣等處行中書省右丞崔
公佩印分省平蠻統馭有司褒寵有秩亢馬步軍二萬
人屬之公以為廣西路府州治一十有六而靜江柳慶
賓融猺寇為甚合謀定計審勢分征供給有需轉運無
乏公命元帥鄂諾爾正奉往靜江之西山親王鄂爾多哈斯
董之元帥伊喇正奉往慶遠兵部尚書李大成萬方鄭
昂霄董之副帥張昭毅往賓中書舍人瑪嚕董之若柳
重險之要衝而融羣猺之淵藪公獨先之柳而期以皆

後會於融將為百道並攻之勢以伸三軍凱旋之威長驅而前席卷庶孽直抵大塘楓木林絞峒等團奏俘奏馘焚蕩殆盡不踰月柳寇悉平諸帥未奏功而公獨先期以泰定丙寅正月十一日至融乘勝克敵勢不可緩又何待邪以十六日抵長安黃石周村督戰甚急敗獲者墨江等凡六團欽承恩詔嘉與維新公曰噫嘻好生之德洽於海宇敢不對揚聖天子之休命乃撫山川之形勢按義兵之丁欽命萬戶哈喇布哈抵鵝頸嶺武陽

扶打團宣上德意當雷霆霹靂之餘而沐雨露雲濡之澤莫不納甲兵降帳下萬死無懷異志乃示威福遣以安居王師凱旋撫循之道責在司牧明張公榜諭以休息宜融之冠洗心革面允大搔等來降者二十八團有與民交易之樂融民得免征役之勞皆公之力也僕衰老之蹤力疾供役轉輸給餉幸免于罪而斯民耆耋屢請勒石以紀公功僕慨爾歎曰惟公金貂元勲碩德良輔忠顯于國孝形于家府君八十餘以山東宣慰致政

公則抗章賦歸欲供子職浮雲軒冕孝道盡矣加以愛君憂國所至有聲沐雨櫛風身先士卒故曩歲克叛寇於江西今則奏平蠻于嶺右忠職至矣表歸薇省王制新崇猶未足以報公之忠厚八荒一霖豈獨玉融之幸也僕昔侍公而知公之德敢因民思而勒諸石焉若夫承流宣化老守之責勉焉趨事用不敢辭維時分省掾吏趙忠袁禎贊畫居多知印達實哈雅宣使瑪勒李肅顏必博囉馳驅王事咸有功焉融州達嚕噶齊沙圖州

判馬英隨軍帳下同知張阿勒坦布哈供事軍需各宣力
以抵於平故為之頌曰

於戲皇元君明臣賢混一無前禮度有文法制有刑萬
邦來臣維茲嶺南地險俗頑叢生百蠻瞻天之高勢若
可逃雨嘯風號疾呼其徒如鼴如鼈以速天誅王人遠
臨相臣專征師將協心長披餘鋒笑剪渠兇後及玉融
赫然雷霆熙然陽春仰沾德音蕞爾遺黎再造於茲萬
死無為允此武功左相式隆克孝克忠融山之巔民頌

石馬期萬斯年

運籌亭平蠻碑

明 錢 淳

天子御極受羣臣朝乃赫然怒曰蠢爾苗孽毒我兩廣
屢伐不悛驕悍茲甚豈守土非其人乎乃黜罰兩廣巡
撫巡按暨三司之在職者尋命太監盧永陳瑄汝其監
督我軍務命都督同知趙輔為征々將軍曰維兩京南
直隸江西湖廣廣西官軍土兵之在行者汝皆將之命
都督和勇為游擊將軍曰維兩京達官達軍之在行者

汝其統之命戶部右侍郎薛遠曰汝其飲食予士以主
事左明善王瑤從命監察御史汪霖劉慶曰汝往視師
兵部尚書王竑進曰維侍郎韓雍今參政浙江非其人
不可總理天子曰然遂起公于浙拜公都察院左僉都
御史仍支正三品俸曰允官軍用命不用命汝其賞罰
惟允其事機可否亦惟汝從底乃功公既受命會諸公
於南京衆議欲分江西軍二千達官五百由庾嶺入廣
東大軍則從湖廣入廣西蓋以言者謂賊在廣東宜逐

之在廣西宜困之公曰不然古者仗鉞臨戎專制閫外謂可安國家利社稷雖專之可也叔敖云寧我薄人軍志曰先人有奪人之心薄之也公議既定師及廣西界即議委都指揮鄒宏廉忠策應副總兵范信以截流賊在新會之西者委參將孫震都指揮葛宗蔭等守潯梧南寧以斷大藤峽委都指揮彭倫守興安靈川以截陽峒仍檄湖廣總兵李震隄備分營以進至全州諜報陽峒之賊在公五發偏師皆捷生擒渠魁數人至桂林嚴

刑以示衆守城失機指揮守宋瑛等數人按軍法而行
辟威聲大振士益用命衆謂乘勝宜直搗大藤峽公謂
修仁荔浦皆峽賊羽翼也宜先破修荔以剪其羽翼則
峽賊之勢孤矣又欲誘修荔搖老出而殺之則餘黨可
不勞而自平公謂奉詞致討貴乎名正誘而殺降信義
虧矣乃議和游擊充左哨參將孫麟充右哨葛宗蔭充
南哨而公與太監總兵及廣西總兵歐信等領中哨尅
日進勦又分為二十五哨夾攻彌月而修荔遂平賊無

黨援路無阻絕公乃移師潯州遍詢大藤峽鄉道衆云
峽乃天設備固糧多湏困守數冬乃可覬公謂峽圍六
百餘里皆我軍矣不乘勝而進罔以成厥功乃集將士
諭以朝廷威福之重示以賊勢可滅之機衆遂歡呼咸
願死戰公知其可用益增器械盛餉糧督歐信孫麟及
湖廣參將高端都指揮夏正王瑛等五哨由峽後進公
與太監總兵侍郎御史都督指揮夏鑑白全楊嶼張剛
彭倫柴政馬義梁泰等八哨從峽南水陸並進後令參

將孫震等二哨援於後而別遣將士斷諸山口賊憚勢
蹙仍復掣其妻孥輜重於極險桂州橫石寺塘等厓預
於山南堅立排柵滾木礌石而下毒矢如雨公乃設伏
覘其力弛遂奮甲先登士卒魚貫而進聲震天地縱火
烈焚日色晝暝賊果遁衆云險不可進公謂根株弗拔
旋復滋蔓督進益急直抵橫石等厓九層樓等山計遣
壯士於賊所不備處攀援至絕頂舉砲為應衆復環攻
連數十合峽遂破矣前後得大小寨峒九百餘處擒賊

首侯大狗等并俘獲男女三萬餘而逃墜凍死者無算
公乃改大藤峽為斷藤峽刻石山頂以紀厥功公復思
處以大計謂內餘孽雖畏威向化苟控御稍佚終必為
患宜設土官編管其殘畊耕植其荒土若上隆知州岑
鐸請釋其罪移州峽內以隸於潯武宣之東鄉為峽後
門貴縣之龍山為峽右臂宜設二巡檢司選土人為副
巡檢乃乞銓官降印以主之徙周冲巡司于峽之上水
徙靖寧巡司于峽之下水廣西歲番湖廣官軍一萬貴

州官軍五千宜重選其強壯以永固守廣東宜安插達
軍四百於城內以備遣調初委鄒宏范信等截殺屢以
捷聞今凱旋士皆歛迹無譁秋毫不犯於衆又分遣官
軍往助不旬月而流賊悉除兩廣平矣

永安蠻碑

桑悅

皇帝治天下七載四方寧謐惟西廣巢賊屢經斬艾蘖
芽稍茁時復陸梁永安生僅成萬攻圍州治且結構修
仁荔浦等邑沿府江惡黨阻截江道軍民大擾監察御

史林公廷選巡按廣西堅於用兵自斷不惑遂會議馳
驛奏聞命下爰整六師期旦夕吹氛淨地先是是年三
月守興安指揮麻林謀報湖廣武岡之楊峒苗二千餘
出抄掠居民列營於西延石谿千戶唐瑛總甲葛明鑑
迎敵而殲虜益鴟張林公即檄副使武君清督行都指
揮事指揮楊觀嚴兵於魯塘咸水諸處分布入款熟猺
於要地賞罰嚴明人奮其勇右布政使黎君福僉事王
君本儉又協相其間斬首三百級生擒一百五十諸苗

賊遠遁一方底寧至冬遂舉永安之師總鎮太監王公敬總督右都御史閔公珪總兵伏羌伯毛公銳又同林公俱臨平樂駐劄昭平總計三廣官軍狼兵達軍民欵多寡分為四哨會委副總兵郭君鎔副使武君清統兵從荔浦洗府江西岸諸村左參將毛君倫僉事劉君信從五屯除西鄉諸賊巢自象州修仁直掃六峒等穴則屬之右參將歐君磐參議吳君昭自廣西盡平府江東岸等地則弁之游擊王君永僉事王君本僉又調僉事

黎君鼎巡賀縣截漏通會游擊俱得雋參政徐君鏞繼
餌無缺乏僉事陳君桂閱視紀功惟謹其東西水陸恭
城壯面恐賊覓途潛逸則別令副使向君榮指揮楊觀
背腹夾攻設網既密脫目者寡太監張公瑄又輸資助
軍究心贊畫克成厥功共破村寨嵒峒一百八十處斬
首六千級奪回被擄男女四千四名口俘獲賊屬及賊
器械俱無算我師大捷無亡矢遺鏕之患四月二十六
日班師攻各嵒峒允險阻莫上歷代為賊長城率不可

拔者熏搜扒擊今皆化為虀粉惟郭武所分通天嵒賊
憑高下矢石我師攻圍月餘其固如故今總督右都御
史唐公珣初下車即星馳至平樂督戰益力衆智勇俱
奮嵒遂破時郭已擢漕運總兵去軍歐繼郭為副帥奉
唐公區畫經理府江無不順流予觀我朝命將出師有
事南夸其功莫偉於是也初功將成閔公已擢南京刑
部尚書之任自出師而旋其間運籌進討校寔功次委
任得人勸懲有道無不用命用是賊衆數十年蟄虐之

患一旦盡平謂非林公始終其功邪昔東漢大將軍竇憲既破匈奴當時威靈氣燭亦必烜赫宇宙不旋踵野烟沙草磨滅殆盡班固為作勒燕然銘有斬溫禺釁鼓血尸逐染鍔之句藉以轟震千古若林公者集羣策協衆力平蠻之功無愧於古可無紀述以見我朝武功之盛挾雷霆而共震配日月而並明者哉宜磨桂山之石勒予言以傳不朽銘曰

自古南夸或臣或叛充國董威新息彌亂有如孔明生

擒孟獲又如狄青崑崙夜克永安接壤四面生夸寥寥
府江化為鯨鯢文武協謀分哨進討無險不登無堅不
搗少壯殊死僵尸如麻高嵒清血凝帶殘霞獻馘連連
千牛行酒宜築京觀以憚羣醜邊患底平其功何屬曰
惟柱史終始提督捷音聞朝天喜滿容定膺爵賞以示
褒崇昔漢竇憲大摧北狄燕然勒銘孟堅秉筆歐詩南
獠韓疏黃家我勒斯銘昭代之華

平馬平蠻碑

今天子即阼之明年為正德丁卯守臣言粵管柳慶獐寇四出剽掠盜橫狡昏狂奔以干大刑弗戢將蔓愈蔓愈難圖也惟聖天子天造神斷克清大憝以武定南服詔三府元僚率兵徂征時元戎伏羌伯毛公適有總漕之命不果行總鎮御馬監太監潘公忠總督都察院右都御史陳公金並奉節鉞共徃視師而總戎之責總督公寃兼領之犀甲熊旂錫盾雕戈舳艤蔽江旌麾遍野以鎮守司禮監太監蔡君昭副總兵都指揮同知康君

泰兩廣左右參將署都督同知馬君澄都指揮僉事金
君堂官君纓分前後左右哨以兩廣左右參議林君璿
錢君灝羅君榮僉事王君秩蔡君鍊暨余監諸軍事以
副使陳君崇德及桂林知府汪金恩理餉事仍悉統于
中軍由是兩廣之漢達官軍及兩江之夸酋目兵雲合
蝟集亡慮十萬之衆而巡按御史盧君翊寔專閥功糾
獎之任上下同心彼此戮力罰既不貸賞亦無吝是以
所向無前以戰必克自冬徂春用兵十有一旬搗巢掃

穴斬首畿七千級其為蠻所脅從及願聽招徠者並釋之仍屬分守右參政楊君茂元輩處分嗚呼偉哉余聞古者天子之牧四邊也其義羈縻勿絕而已我國家聖神相繼威武彰大湛恩汪濊風之所被罔不披靡顧茲蠻獉乃敢跳梁山澤殺人掠貨結巢據寨重為疆場之擾何邪蓋蠻獉異類者也其暴虎其貪狼而其捷猋狹也惟在乎治之者得其要而禦之者有其備斯則疥癬之患有不足為吾慮矣蓋天下之事莫難于兵天下之

才莫難於將夫統十萬熊羆之士驅虎之力制之一非
其道則若奔馬之轡不為吾用矣况使之觸白刃冒流
矢赴死如赴生趨勞如趨逸非仁不能以懷非威不能
以戰非斷不能以行非智不能以謀非信不能以服又
必如珠之走盤如環之無端不膠於一定不狃於一偏
則兵未戰而先勝矣惟吾總督公具文武全材行事適
機宜而風采足畏愛凡軍中事無大小諸軍必諳而後
行文移山積日復旁午公則批答如流尤長於用兵所

謂一衆人心力耳目使所至如時雨者公寔有之出奇
制勝決策料敵雖古之名將何以加焉總鎮公鎮靜有
容不立町畦事之出於總督公者若自己出未始嫌於
逼已所謂事成於同者非邪噫斯舉也鏗鏘炳耀燭人
耳目吾不知南仲山甫之在當時亦若是乎烈邪其事
固無可紀邪于是柳州知府劉璉進而述父老之詞謂
馬平在國初本十有八里永樂三年獵寇起有韓總兵
者督兵捕之而蕪其田乃為慶遠宜山河池之獵所奪

遂併十八里而為七宣德三年有山總兵者調兵勦之
而反為寇所襲置橫羅歸安堡以守禦之景泰初元羣
寇蠭起聚至萬餘圍柳州城幾陷賊勢益熾遂併七里
而僅存一里之半嗣是以還曠誅數紀蓋羣兇猾寇不
謂復有兵能壓其境者矣今茲乃若摧枯拉朽之易而
又奮餘勇出異謀開峽道以通襟喉置哨堡以示保障
七八十年兇悖之氣一旦銷沮殆盡戶口賦役復歸版
圖見百年之所僅見為前人之所未為有功於生人大

矣非託諸文字之雅烏足以示近而傳遠余誠儒生濶略不適於用謬承臺檄躬在戎行雖獲尺寸之功亦猶豐山之鐘霜既降則鏗然鳴蓋氣之感非自能鳴也聽於下風竊自增氣故不辭而書之亦欲效蒼蠅之附驥用垂斯名於不朽故特強顏為之

田州立碑

王守仁

嘉靖丙戌夏官兵伐田隨與思恩之人相比復煽集軍四省洶洶連年于時皇帝憂憫元元容有無辜而死者

乎廼命新建伯王守仁曷往視師其以德綏勿以兵虔
乃興師振旅信義大宣諸蠻感慕旬日之間自縛來歸
者七萬一千悉放之還農兩省以安昔有苗徂征七旬
來格今未期月而諸蠻率服綏之斯來速于郵傳舞干
之化何以加焉爰告思田母忘永勒山石昭此赫赫文
武聖神率土之濱凡有血氣莫不尊親

田州石刻

田石平田州寧

民謠
如此

田水繚田山迎

府治
西向

千萬世輩皇

明嘉靖歲戊子春新建伯王守仁勒此石告後人

田石平碑

汪必東

田江之濱有怪石焉狀若一龜卧於衍石之上長倍尋厚廣可尋之半境土寧靜則偃卧維平有青則傾欹潛浮以離故處故俗傳有平寧傾兵之讖歲乙酉岑氏猛食采日殷恣橫構兵守臣方上疏議討一夕石忽浮去數百武猛懼乃使力士復之嚮夕殷祀之以潛弭其變明年大兵至猛竟失利以滅人益異焉猛黨盧王二酋

脅衆連兵據思田以重煩我師朝議特起今新建伯陽
明王公來平比至集衆告曰蠹茲二酋豈憚一擒維瘡
痍未瘳而重罹鋒刃為可哀也即日下令解十萬之甲
掣四省之兵推赤二酋俾自善計二酋憚公威德且知
大信不殺遂率衆自縛泣降公如初令諭而遣之單車
詣田經畫建置以訓奠有衆田父老望風觀德如堵如
牆羅拜泣下曰大兵不加明公再生之賜也田醜何以
為報維田始禍石寔釁之具以怪狀聞且曰自王師未

旋石靡有寧田人惴惴守之如嬰今則亡是恐矣願公
毀此以寧我田公曰其然與若等徃觀之既觀曰汝能
怪乎吾不汝毀而與決取筆大書其上曰田石平田州
寧千萬世翠皇明年春公使匠氏鐫之遂以為田鎮
田人無遠近老稚咸謳歌于道以相慶焉嗟夫維石在
阿賦性不那就使之行豈民之訛維妖維祥肇是興亡
天寔變幻而莫知其方維邪則洩維正則滅亦存乎其
人而已矣公忠誠純正其靜一之學浩然之氣見於勤

王靖難者可以格神明而貫金石天下已信之有弗靈
於是石乎田人寶茲石文蓋不啻交人之累銅柱也已
公車將旋田人趣必東曰茲不可無述以告於世世作

田石平記

征南碑

公在福建時作立石廣
西分茅嶺鎮南關上

田汝成

皇帝承運文宣武謐宇內熙皞兆四郊以崇天建九廟
以尊祖於是百靈薦祉元儲應期將以誕告多方外諭
四裔廻坐明堂朝羣辟按圖數貢至於安南曰茲邦不

庭廿有餘稔豈其叛哉曷往詰之禮官肅將瀕行會有
黎氏逋臣詭辭而控曰臣南裔藩臣黎氏之嫡胤也國
有不令之雄曰莫登庸者寔篡黎宗逐臣草莽惟陛下
憐而納之皇帝若曰信茲稱亂其往討之迺命兵部左
侍郎蔡公經安遠侯柳公珣經略邊務以需大舉蔡公
簡委賢豪參謀畫策而左參政翁君萬達寔總其凡迺
圖山川發間諜探要領峙芻粟礪矛鏑選偏裨練卒乘
義問昭乎日星威稜抗乎風霆交人聞之大懼登庸披

脇吐款奉表而稱曰臣先臣黎氏之陪隸也黎氏式微
國亂無象臣以皇靈削芟草竊僅有寧宇黎氏夭絕屬
纊之晨倉皇解佩印而屬之臣曰天錫元寶爾姑守之
請命以聽所立也臣恐駭逃匿國人周章索臣擁之左
推右輓責以大義曰不守錫寶是不共天朝也不受君
命是蕩析黎民使不保也臣不得已苟從夸俗護印五
年而犬馬之齒耄矣復以屬臣之子十有一年再嘗遣
使款闕而闕令嚴不敢啓方物敝不敢移易也封題較

然臣父子兢兢惕惕罔敢專席旦夕稽首北望曰天監在茲夫黎氏不請而屬之臣臣又不請而屬之臣之子死罪死罪第黎氏忽亡而國人謬擁避迹無所若臣違道以徼之安能變如於再世也謹以土地人民之數咸簿錄之登獻闕下惟天朝處分事聞皇帝若曰咷哉豈其挾詐以緩我師其徃覈之廼命兵部尚書毛公伯溫節制六省咸寧侯仇公鸞都統諸軍勅曰聽以軍徃違即征之毛公蔡公協忠同心以作義勇廼勒兩粵勁士

分為三軍副總兵張君經將中軍翁君萬達監之參將
李君榮將左軍副使鄭君宗古監之都指揮白君泣將
右軍僉事李君文鳳監之勒滇南勁士分為三軍都指
揮胡君紹將中軍副使鮑君象賢監之都指揮方君策
將左軍副使鄭君騶監之都指揮王君立將右軍副使
張君絅監之而幕府遂移進止機宜則惟翁君與焉於
是八蠻五獠侮食左言之長吳鈞越棘狼蠭鳥章之士
俊壯介象雲梯樓船之具莫不獄獄從從麻列喟合箕

張翼舒闌騎乎桂海蹈籍乎炎徼矣交人聞之愈益大懼登庸之使疊迹轅門攄櫂哀憇懃以降請轅門僉議以為在古降儀或牽羊以表順或昇櫬以請誅彷彿於斯乃見烟抱登庸頓首敬諾轅門迺啓鎮南之關奠龍輿抗黃幄陳兵森扈登庸徒跣囚首白組繫頸稽顙稱曰臣斧鑽遊魂也無異圉豕陛下不發乘輶曳尺纏牽而剗之縣首藁街以昭誠不諳是陛下以不忍羣黎之故而宥微臣微臣幸藉羣黎以延殘喘臣聞命以來魂

魄飄喪悽悽荒懇又不足以感格皇乾重煩訊使詰責
誠偽死罪死罪復更何言臣今共順之情鷁鯀之狀繪
圖不足以為獻剖心不能以自明惟陛下憐而察之臣
率土編戶也戮之惟命俘而放之四荒惟命若以天地
之量覆育螻蟻宥之故穴亦惟命謹以先朝所錫金印
一枚黎氏所侵四峒之地遣從子文明表獻闕下以聽
處分臣昧死言不勝隕越轅門僉議以為其辭順其儀
恭其衷無偽違即征之天之命也服而舍之武之經也

爲之解組而遣之按兵不進以狀聞皇帝若曰嗚呼皇
天以予一人撫鞠四海匪威力是憑匪玉帛山河是愛
惟蒼生塗炭是憂黎氏守職無狀衆叛親攜馴至天絕
莫氏宣力北戶安堵朕亦嘉之其革王爵易國號置都
統司以莫氏爲都統使世掌其土以共王命詔至諸軍
解嚴南土驩呼飈馳鼎沸矣是役也君子以爲莫氏知
命者四繫組以請死也歸地以贖罪也函印而獻之以
完寶也不貢方物以明畏也詩曰畏天之威於時保之

其得不死而且世官也宜哉當兵事之初興也汝成嘗以藩寮分守左江悉厥顛末昔愍其勞而今欣其訖也廼述而銘之曰

粵有交州蕞爾瀛介三代之隆擴於荒外羸秦遠略廼闢其疆聲教漸被歷漢而唐五季紛綸土酋竊據涉宋而驕益煩邊慮大明受祚陳氏奉賓皇祖嘉之俾仍舊封季犿賊逆毒蔓雕題文皇征之掊戮鯨鮀索肩于陳絕不可得廼建省垣約以繩墨黎利再叛詐擁陳後宣

廟慈宏包荒那叩錫爵給印樹為藩邦三葉而墮遂覆
厥宗莫氏承之諸裔庸懷不請而禪於義則乖皇帝赫
怒渙號徵師如雷如電海岳離披緯武經文維兩司馬
矯矯元侯從天而下司馬有令既嚴既明翊用翕君廉
信以匡鋪敦義勇奮搏虎奔朱鍪日麗元甲雲屯藉令
戡之倏如畦耨載鞬載詢蓄武不究交人聞之喙喙彈
彈傾巢舉落俯訴仰干蓬跣繫網蛾伏而進順效牽羊
請同昇櫬匪寇匪篡庶幾有辭皇帝憐之遂以德來乃

削其爵而畀世官比於內吏輯我龍編交人驩呼曰父
母且完我妻子築我室廬曠曠天威盱盱而在瀛瀛天
恩含哺以戴如春之育如海之容訓爾孫子惟王之共
虞格苗民淹于七旬交人來歎曾不浹辰商伐鬼方三
年而服宰割交州曾不遺鏃我紀其事勒之貞珉伏波
銅柱又何足云



粵西文載卷四十五

欽定四庫全書

集部

粵西文獻卷四十六

詳校官庶吉士臣瑚圖禮
主事銜臣徐以坤覆勘

總校官庶吉士臣朱 錡

校對官中書臣牛穎文

謄錄監生臣沈世政

欽定四庫全書

粵西文載卷四十六

桂林府通判汪森編

碑文

平蠻

平斷藤峽碑

在柳州

毛伯溫

按峽舊名大藤曰峽有藤大如斗延亘兩厓諸蠻遏商
艘掠郡邑援藤出沒若蟻渡然是其險以劇寇著也烈
哉韓公雍已平茲峽改曰斷藤故粵有督府自平大藤

始嗚呼民有寧宇者僅數十年乃復據阻于峽夫蓁莽既翦厥有遺孽久則蔚薈先是有勒田寧之師襲擊之者峽南稍平而其北繹騷以起蓋渠賊匿而孽本存也侯勝海者居弩灘稱亂其讎土酋黃貴者誘勝海入市中刺焉其弟公丁擁衆譟城下殺居民而去巡守左江諸司陳其狀于督府乃謾咈審勢者之議擊以輕兵賊聞先遁即設堡以兵三百戍之公丁鳩其黨夜犯兵之遇害者二百人巡按御史諸君演疏其事請征詔曰可

時兵部侍郎兼都御史蔡公經文武兼資茂膺帝簡受
茲聞寄而部檄鄭重以征陝之命申飭馬公秉錢奮虔
巡按御史鄒君堯臣贊畫益力適有安南之議請緩之
而公丁橫勢日急潯柳之人若集于夔參政翁萬達時
為副使議曰腸胃之疾待時而治可乎公以為然萬達
與參議田汝成計遂羅得公丁檻致軍門磔于市僉議
舉兵襲會撲其醜類乃復持見不一或曰首惡已俘餘
黨褫魄王者之師示威而已又曰殲之不必且招之

招之不若容之以為德也萬達曰不然誅其大憝其衆必搖勢勿可已也而况慄鴟冥頑雖厚施不為德耶或又進孤軍猝勦之說汝成議曰達時不可以居功惜費不足以弭患萬一諸蠻自揣不免峙糗徙巢伏匿深必大會兩軍側入窮搜而後已若猝勦非計之得公乃度衆說而宰決焉時十八年正月也於是以副總兵張經將左軍翁萬達監之會于南寧而指揮王良輔朱昇凌溥柳浦周維新孫文繡屬焉以都指揮僉事高乾將

右軍副使梁廷振監之會于賓州而指揮馬文傑王俊
戚振吳同章屬焉督餉則參政林士元參議田汝成紀
功則副使蕭晚二月丁未兩軍齊發誓師作銳按圖授
略分哨截隘出奇設伏南北夾擊衝援縱橫賊大敗奔
潰而東王良輔暨諸偏領鼓兵邀擊之復蜂潰而西諸
軍蹙斬勢若刈菅其俘者具言官兵聲至首老約毋結
巢今直漫走東奔者已入羅運山矣遂移兵攻羅運檄
右軍抵長洲沿江而東繞出其背賊乃刊木塞逕布蒺

藜置篴簾懸石樹杪莽中則伏機弩毒鏢我軍悉皆奪之斬其迎敵者賊復大敗適平南古陶諸猺亦弗靖即乘大衆取道平之乃以三月庚寅班師僅四十五日凡斬賊級一千三百五十有奇俘獲四百五十有奇奪其孳械無算丐降聽撫者二千九百有奇咸自犁故巢挈遷曠原以就編隸跋既平萬達汝成復相與酌議陳善後之策于公其目有七皆鑿鑿然恬輯之要以是柳潯之間河疏道通農業工惠監牧者紓隱憂矣是年予奉

命偕公平安南之僭明年冬班師于邕柳守戴嘆具狀
介其屬教諭趙翰高詣邕曰柳者峽賊之所便而受害
必先者也今固可卧護矣而敢忘其靖謐之自乎敢以
記請東塘子曰蠻獠之暴布南土也種種爾其毒烈浸
淫非可以仁柔之也故雖聖哲者作亦必杜其警端震
之以兵然而難舉則有遺本署設則有穴竄於是乎吾
觀平峽之績而知君子之猷也蔡公閩人字綦闕沉毅
惠達目無全寇聲寔洋溢虛懷良善是故羣才樂為之

用翁君淵察敏斷應變不匱張君洵茂重慤持柄靡忒
田君知謀善慮宣博有本蕭君敦恪公亮持法不撓皆
丈而知權者也公能用之故張不窮威弛不遺艱斯則
共服社稷之役允托金石之傳宜備紀矣乃今安南之
平公寔元勲而翁君蕭君張君暨王良輔復同事平夸
尊夏之功視征蠻益烈豈偶然哉戴守循廉有聲聿修
政要治船三百具舉水軍之燭與有勞於平峽得弁書
云

平斷藤峽碑 在潯州

郭文經

斷藤峽在潯州北境江源出牂牁經柳象逾武宣東流為峽江灘激湍鳴電奔雷闢兩崖萬山延袤可六百餘里攢壁東流峻嶺峩峩谷隱林亘列崗晝黑猺蠻異類盤據其間恃險為巢倚山立寨狙詐鼠伏豕突梟張自古百粵寇盜稱難平者惟藤峽云成化改元襄毅韓公雍將兵十餘萬討平之潯人始藉有寧宇正德末年餘孽漸繁嘯聚剽掠江道復阻都御史陳公金用撫處之

策喻以魚鹽瓦器商舶稍通狼慾無厭尋復為梗嘉靖
五年新建伯王公守仁以田寧之役振旅道潯出奇兵
勦伐南賊頗懾伏而峽山以北諸猺哀克鞠頑勢日新
熾十六年守臣誤聽武人之言遽立堡以三百戍守其
地大寇未滅而我威不揚懸孤羊於虎口何能為也頃
之賊首侯公丁聚黨殺戍兵變聞疏其事請討之十七
年令提督左侍郎蔡公經定遠侯柳公珣集諸司問討
時副使翁君萬達分巡守左江條列諸便宜而蔡公可

之悉以軍事屬翁君密計擒公丁遂棄市翁使指揮周維新千戶李琮圖道路山川遠近險易之狀設間諜募鄉導巨謀纖計悉為規畫事既有緒乃白蔡公以副總兵張公經將左軍三萬五千六百有奇翁君監之會於南寧指揮王良輔朱昇柳浦凌溥周維新孫文繡屬馬以都指揮高乾將右軍一萬六千二百人有奇副使梁君廷振監之會於賓州而指揮馬文傑王俊戚振吳同章屬焉紀功則副使蕭君晚督餉則田君汝成暨參政

林君士元乃於十八年二月丁未兩廣齊發左軍則王良輔率部兵繇牛渚灣越武靖攻紫荆大冲根姜老鼠諸巢朱昇率部兵繇三等村渡蓼水攻二驢石門軍營大黃泥嶺諸巢柳浦率部兵繇白沙灣攻道袍大井李儀洪泥梅嶺諸巢凌溥率部兵繇白沙下灣攻大昂屋夏小梅嶺諸巢周維新率部兵繇白沙上灣攻胡塘菉水竹埠諸巢孫文繡率部兵繇斷藤峽遡流與六軍合攻大坑巢右軍則孫文傑率部兵繇武宣過太廟從流

而下攻碧灘錄水諸巢王傑率部兵繇武宣踰山而東
攻羅錄上峒戚振率部兵攻羅錄中峒吳同章率部兵
攻羅錄下峒又遣指揮左輔巡邏營壘之間諸軍南北
夾攻賊盜大窘欲北走府江王良輔以兵邀擊之中斷
復西奔諸軍蹙斬千二百級而東奔者遂結巢羅運據
險設伏迎敵我軍皆以計破之斬首百餘級賊盜愈大
窘會平南縣小田羅應羅鳳古陶古思諸猺亦弗靖田
翁二君復移軍勦之斬首五十七級乃以三月庚寅班

師凡四十五日而畢事降其餘黨四百人而江南諸猺投順者千餘人藤峽悉平翁田二君乃相與陳善後之策上督府從之其目有七具載藤峽記略書可考也先是賊首侯公丁繫獄中諸猺唼唼言漢法只坐公丁不虞官兵卒至駢首就戮故不二月而獻捷曾聞父老相傳今日平峽之功視之韓襄毅為尤烈云文經潯人也習見諸大夫計定帷幄謀成几案師出以律兵不過戮故鼓進之日市無易肆農無廢業順者幸寧逆者悔過

爾來邊堠無警樵採不驚峽道晝行城門夜啓有首有
趾咸識太平諸大夫之賜也使繼諸大夫者篤行前猷
潤澤七事以防遏其端而潛消其漸則所以功德吾民
者甚厚亦諸大夫立法垂永本意也周維新王良輔李
琮輩從事茲役又以尋人父老言屬文經紀之因叙始
終大略詔來人以示觀風者采焉

平魚窩刻石

張岳

聖天子臨御二十四年為嘉靖乙巳春詔提督兩廣軍

務都察院右副都御史張岳總兵官征蠻將軍平江伯
陳圭征剿馬平縣五都諸蠻據危險為巢以十數大
者五六百人小不下二三百多儲蓄歲以防征秋八月
徵兵悉會龍城分為三道右參政鄭絅監參將戚振統
南丹兵由中道以向魚窩雷巖同良北岸左參議趙崇
信監參將孫繼武統那地兵由東道以向馬鞍平田北
冊洛滿南團口巢副使魏良輔監都指揮李霽統東蘭
兵由西道以向都博高桅龍船九月丁卯諸軍按道分

攻雷巖北岸平田北冊洛滿都博克之遂進圍魚窩馬
鞍高桅諸巢冬十一月幕府至自蒼梧廣東右參政張
烜從至留參謀畫又檄副總兵程鑒馳入兼統諸軍畫
夜督戰攻技並設無遺巧賊亦隨方為備明年丙午春
三月僉謀緩攻以弛賊備撤圍若去之已而復乘之各
募敢死士緣石壁夜登奪其險陘據之諸軍以楯相擁
翼繼登戰于陘中又戰于支頂且戰且登遂至絕頂火
炮矢刃迅激交發呼聲震山谷夏四月甲午馬鞍破丙

午魚窩破魚窩者尤險惡自國初以來凡四攻弗克至是與馬鞍俱破蠻中震恐俄而高桅同艮諸巢破因撫輯餘黨分兵屯守護旁近居民耕種遂班師是役也自秋徂夏嶺外行師未有若是久者而將士效命謀猷審壯異論莫能譁久益奮厲迄用有成功以仰副聖天子詔命是月幕府移駐柳城既又至千蔓周觀營壘閱諸將功最叙刺于厓石山可夸石可砥惟天子威靈彰撣遐邇億萬千年永永無已

陽朔縣記事碑

王宗沐

廣西陽朔縣治介盜區而湖北獵尤稱逼肆聯絡古田
自弘治中官兵征之不克敗沒總兵參議因而驚桀遁
移入據鬼子莊頭等巢時出掠殺其令張士毅占民里
田廬令不得耕牧嘉靖三十一年五月提督府始命都
指揮鍾君坤秀統千人戍之而僉事歸安茅公坤來視
府江兵備事是年八月賊出掠公以兵五百益鍾徼之
擂鼓巖山殲五十三人十月戍兵又掩捕賊首四人其

黨益急殺牛誓衆大舉公密請督府符下得便宜行事
是年十月十二日公部署七哨合狼柳軍兵三千人約
鍾君密搗其穴別以知縣王弼率舟師往來江上遏其
西渡百戶李爵以堡兵駐石井防其東逸劉宗武以鄉
兵守巢後而獨千戶陳襲將千人揚聲故渡荔浦江迂
道誤之詶者還報而賊少懈十五日夜兵集各戰其地
指揮吳國威克莊頭馬蹄千戶孔繼宗克木羅水雞劉
承緒克馬驥外祚百戶李環克爐巖義勇巖璉克新橋

倒龍千戶劉積滄克刀山強布惟襲等所當鬼子巢堅
箐深從高下木石拒戰明日始克之合允斬首一百六
十七顆擒俘三百八十七人獲牛馬及走死者稱是威
鎮遠近凱還賞賚有差是役也寔督府遂昌應公文武
為憲申賞罰法且許其屬以便宜而茅公又宏才壯志
畫中機宜方戰日雨甚公焚香禱天願以已生二年易
晴二日佑將士其勤類此故能約兵省費而斬獲奇捷
誠傳載鵬勦所未嘗有陽朔里戶婦子自是始知樂生

日卧帖席云

平古田大功碑

張翀

隆慶四年皇帝念廣西地方近為諸尚蠻所蟠據縣日以削乃下廷議諸大臣議曰廣西南制交趾西控滇貴北連荆楚蓋天子所以藩翰邊陲之國也誠不可委之不治然非專勅撫臣特有才望者以開府其間殆不能有成功乃簡石汀殷公某以都御史授節鉞而來維時兵部左侍郎蟠峰李公某為總督素與公志同道合公

既至即檄諸司議所宜先適今都御史華溪郭公某為
左轄力贊公先平古田蓋古田自弘治以後官兵敗績
縣治湮沒甚至越會城戕命吏罪莫有加焉者公意遂
決七月徵各司兵凡十萬人總兵官俞君大猷總其事
以參政榮君淶參議龔君大器副使鄭君一龍應君存
卓邵君維中僉事金君柱等各為監軍督餉以副總兵
門崇文參將王世科黃應甲遊擊丁山都司錢鳳翔董
龍魯國賢等各為督哨分七道進凡三閱月破巢六十

有二斬首級七千四百有奇俘獲賊屬牛馬器械以數萬計我兵無一摧折者生擒首惡韋銀豹等械送闕下皇帝稱賞焉各晉秩有差公又疏復縣治改為永寧州即其下六里最頑梗者立為三鎮以分其勢而扼其背焉可謂經營之全能矣即今桂林以西民猺樂業豈非廣右用兵以來二百年之偉績歟廣之父老子弟及鄉士大夫莫不感公之德思以銘之百世某里人也胡能贊一辭哉因不揣僭為之言曰同一古田也在先朝之

初則以三省之力而不能救諸將之倒戈在當今之時
則以八十年之險而不能保數旬之破竹豈其時有難
易抑亦事有優劣歟嘗推其故有三三者何天子保治
留心四彝而碩輔元老銳意安攘之烈故公得以無內
顧而展其才此成功之始也公又以豪傑之才光明之
度壯猷多算不奪於羣議而一時文武諸賢同心戮力
此成功之中也收兵之後不事虛文必分勢立鎮以堅
其無反側之心此成功之終也非始不足以乘事機非

中不足以決大策非終不足以保長治然則是功之成
也不亦有然哉雖然某猶有說焉漢充國經略先零之
時兩將軍與中郎將出擊降斬萬餘人詔罷兵矣充國
獨留屯田明年五月又降斬三萬有奇乃請罷屯兵古
人經略長久之計不可見乎是故廣西之寇亦多矣如
古田者不暇悉數古稱唐虞之仁不能柔秦漢之勇不
能威信未易言也所深幸者有石汀殷公為之於前而
又得華溪郭公繼之於後二公皆當代豪傑其所樹立

皆非尋常可同日語者則吾父老子弟享太平之澤寧有窮歟寧有窮歟某不敏敢以是刻石告之將來

明隆慶五年正月管糧參政柴淶監督副使應存卓邵惟中鄭一龍參議龔大器紀功僉事金柱統督參將黃應甲王世科門崇文梁高盧鑄遊擊丁山都指揮錢鳳翔董龍魯國賢會合各路官兵連日攻克古田之潮水藤浪馬浪三千苦累麻竹天堂扶臺龍角西洋陰山鳳凰老莫馬驅思美頭盤古城思鷺君師

王武石盆古各水頭死馬古底諸巢斬獲巨魁韋銀
豹黃朝猛徒黨首功萬計俘獲數萬計其運謀出奇
於上則提督兩廣軍門李遷巡撫都御史殷正茂巡
按御史李良臣總監則左布政使郭應聘也協謀則
按察使萬思謙副使陰武卿陳其樂僉事楊文明及
都指揮王德懋也總統征蠻將軍右都督俞大猷識

平府江大功碑

維廣右崇山大谷逶迤數千里蠻生其間負險易亂自

秦以來教化所不能行恩信所不能結唯在乎威之而已威之為道小之則勦大之則征豈不存乎其人哉諸蠻自蕩平古田之後稍事斂戢唯府江猺獞當全省襟喉之會由正德己卯以迄於今幾六十年矣其間負固阻塞劫掠占據使一州五縣之內行旅官民田糧府庫受害有不可勝言者雖仁人慈士猶且奮臂况以豪傑之才總文武之寄者哉維時巡撫廣西副都御史苗陽郭公某適膺其任公蓋憂民之深策事之熟者會提督

兩廣兵部侍郎兼僉都御史古欽殷公某當古田戡定之餘有蕩平全粵之志乃各疏其狀於朝朝議以為諒惡不討無以固招徠者之心不如征之便而以先後巡按御史李公某唐公某紀察之二公極留意地方者命令下之日公遂調計兵食發左右兩江之卒冗六萬人以兵備副使鄭君某分巡副使金君某僉事夏君某為監督官以右江參將王世科都司錢鳳翔王承恩原任都指揮使董龍為統督官總理糧餉則以參政胡君某紀

驗功次則以副使劉君某至於總統一切軍事又皆屬
之總兵官李君某于是分布既定謀猷載同諸君罔不
矢心戮力驅馳乎師旅之間兵進於隆慶六年之冬止
於萬曆元年之春正月賊來迎戰者隨戈而倒各退保
堅巢即分兵攻之戰愈力賊各墮崖而下無不克者凡
斬首五千級俘獲數萬頭招降者不計其數何其偉哉
報至天子嘉之恩賚各有優渥公又以大征甫畢善後
宜圖爰酌六事上之六事者復土司設專將通水陸處

兵費定縣治分田糧而以兵備副使徐君某參將王承恩終其事至今三洞兩岸之間謐然稱治平之境矣嗟乎一府江也未征之前商旅日阻州縣日危田糧日損兵費日繁既征之後阻者達矣危者安矣損者增矣繁者減矣何旬日之間而先後頓異如此耶譬之居室然千金之家久而不治日為風雨侵愈支愈敗矣善居室者不以一勞為憚即其敝而新之有不煥然改觀者乎是故因循遷就者養亂之原也任事憂民者地方之利

也故曰存乎其人而已某里人也抱桑梓之憂昔嘗鳴
之闕下久矣乃客歲聞古田平今又府江平寧不大有
歡快乎睹淮蔡之豐功乏昌黎之健筆爰效厥義用附
里銘銘曰

險彼府江蠻負為限幾六十年咽喉之患帝命方叔爰
整其旅睠焉南顧施此時雨維此方叔王命是膺謀似
泉默斷若雷聲乃秉天戈深入其穴電掃烟消霜飛塵
絕我猺我民我洞我溪何以善之屯田便宜膚功既奏

帝曰孔嘉恩賚有渥光於邦家父老曰嘻覩此洪造願言根除百年是保

平北三大功碑

廣西之寇在桂林蒼梧則有古田府江為最在柳慶之間則有懷遠八寨北三為最古田府江懷遠諸賊先是都御史巡撫殷公暨華溪郭公次第平之矣唯北三八寨至今未平瘡痍未起加以蠻性變詐巢穴險阻當事者慎重之也萬歷五年小江吳公適開府廣右計謨勝

算武緯文經乃檄地方諸執事者曰惟廣右僻在南疆
猺蠻為害梗化久矣其議所宜先加兵者執事議曰今
之寇莫憂於八寨北三其八寨業已招撫徐觀其後而
北三者則跳梁已極且立赤幟于諸蠻之間使北三不
懲則諸蠻不懼諸蠻不懼則八寨之撫不堅宜先加兵
無愈於此者吳公曰善會柳慶守巡各以遷職去公遂
檄永寧兵憲吳君善來經略其事馬吳君行公戒之曰
兵貴潛機使敵莫測近而示之遠者法也君其先聲指

嘯河池乎吳君曰敬聞命矣公遂徵兵于各土州司會守巡談道陳君俊尹君校各次第抵任二君素沉幾諳練加以受成於公而又合謀于吳君其猷益壯矣乃以右江參將倪君中化統柳慶諸兵而遷來三哨則屬之永寧參將王君瑞焉兵果先從便道故為聲影于河河嘯之間賊不之疑也不數日則兵趨北三諸賊以為從天而墜已不及掩耳矣兵進凡三十日克破巢寨一百有奇擒斬四千八百名顆而俘獲賊屬視擒斬倍

之牛馬器械視俘獲又倍之自廣右用兵以來神速稱
快未之有也公又疆理土田分兵屯種益為善後計凡
八寨以南河池以西靡不聯絡待命恐恐焉不保旦暮
豈有縱橫出沒如昔者態耶績上上嘉之晉公大司徒
郡中鄉大夫及父老子弟各置酒為地方慶且詣守巡
使君請記使君轉以屬僕嗟乎艸胡能為公記耶昔石
汀殷公平古田僕書於桂林華溪郭公平府江僕書於
蒼梧今桂林蒼梧之間頌二公之功者尚浮於僕之文

是其文不足而其功常有餘也況公之北三又事倍於古田府江而他日頌公之功者豈不益浮於桂林蒼梧耶卉服椎髻鳥語狼心不示其威則不憚也平禍定亂昭德垂信不假諸勒則不傳也南山之石玉屏仙變風雨不來千載一日此非公之碑如有待耶于是父老子弟爭趨而磨懸崖而書諸嵩搖獮莫不相率來視以手加額曰南蠻何敢反乎何敢反乎張翀聞之乃從前數廣西之寇幾已殆盡遂援筆為記

平蠻碑

王錫爵

隆慶六年府江猺起數入逆執事兵擊而不解於是巡撫廣西為都御史郭公應聘受詔討賊會督府殷公古田捷後威聲褫猺魄公與矢枕奮檄諸司道將領曰國家化洽窮髮廣以西幸久康乃一二猺魄憑倚巢險鴟張痏噬禍元元而厪天子肝食維是天厭若而厚其毒以俟我與二三君子二三君子其相與決策剿撫平之諸皆如指是時公威稜所鬯北三北五尚魁回腸內嚮

束身見監司願歸我侵田還我民與之更始乃三峴賊據荔浦縣地破堡圍城殺人兩岸賊據平樂縣地執永安州守吏而奪其印入巢贖之出彪灘賊戕殺千戶周濂土舍岑文日屠人以逞亂如湯沸燎揚各監司以報公曰賊亦張甚矣何用防守歲費數萬金乎不急擊不獨塞兩廣咽喉地將為永安修荔數百里憂于是調土兵為三軍增一水軍為四大軍軍各以副使金柱鄭茂僉事夏道南為監參將王世科錢翔都司董龍王承恩

為督而以上將統諸軍者則總兵李錫也以十月十五
日進搗上中下三峩與東西兩岸諸百十巢寨師如游
龍所向披靡獨中下二峩賊潰入南源雞籠山官兵分
五路犄角邀擊之西岸高天巢乘險拒我兵弗克為懸
重賞乃泗城兵於次日早潛登絕巔以銃號各兵齊登
覆其下自兵進至明年正月二十日凡三月餘部中悉
定斬首五千一百一十有七俘四百四十有八鹵獲器
仗二百餘牛馬二百餘以狀獻嗣詔移兵平懷遠懷遠

據縣侵地跳梁自喜不減府江比公咀雨雪日調兵辦
餉除戎器具舟師募隣兵嚴闢令招黃土青淇諸猺
以携其黨且諭賊曰若能為我擒魁長致之戲下脅從
弗問乃賊固有悛心會調募兵皆至遂水陸分七軍軍
所部文武將吏視征府江時以十二月初四日夾擊自
板江至鷺嶺田寨至籠山西界貴州北界湖廣下堅巢
百十餘先是兵至板江賊以木石障流聚艘為旅拒計
及見水陸兵皆進遂奔潰我兵乘勝尾擊連破之旬日

又復大敗賊於天鵝腮江巴峴諸巢又正月初七日報
賊數千屯郡鄧大山甚急公命發各軍勁兵翼擊破之
十七日攻賊七巢七寨者賊列重柵守者也賊見我兵
入男婦與鬪矢石雨下我兵殊死戰繼之斬柵入四面
舉火烟燭燭天賊大敗部中悉定擒斬三千三百四十
有四俘男婦二百六十有三鹵獲器仗一千七百有九
以狀獻頃之秋八月永寧賊韋狼要者殺人憤土司之
窮之也血其羊以盟永福陽朔碎江諸賊殺千戶章繼

宗公發兵挫賊鋒賊遁右江徐指揮伏以擒狼要餘黨復殲先是公以有事懷遠計且撫之業已具懷遠疏中至是賊益橫又近省詢訖公遂調兵於二年正月初十日大破賊于茶溪有張千戶手刃二賊陣亡又洛容縣者舊無城賊聞懷遠捷又聞典史謝漳將請兵乃潛入漳宅逼奪其印意蓋質以挾撫也我兵拒之漳被創死賊遁已復大嘯集公曰自府江懷遠用兵取捷以來而賊猶爾爾是不當亟移師殲乎若待請始復徵兵勞費

百之謂玩寇何遂檄李總兵調懷遠兵為四軍分抵永
寧永福洛容柳城以將領將之賊聞我兵來棄巢入山
箐我兵尾擊大破之擒斬四千一十有三俘男婦三百
有二牛馬九十有五器仗諸物三百六十有四以狀獻
上皆嘉焉為大頒爵賞有差已而公又復條善後十六
事以請上許之余惟西粵以崇山大陵甲天下百數十
年來諸猺窟其間橫發莫可制乃公受事發縱兵如風
雷役不踰時刀不鈍鋒輓不勘饗一日而釋百萬生靈

於刀鋸者何哉至謀之蕩幽凶固其神也國家天聲訖
塞垣而今西粵山川滌氣出垢厥靈濯濯與皇風神氣
煥然流耀宇宙此其有關於中興為甚大詎云克踵銅
柱燕然爭雄論烈耶謹為次其事而勒之石萬曆甲戌

冬十二月

平昭平山寇碑

萬恭

萬曆初載天子神武有囊括宇宙鞭撻四夸之志而宰
相復經略當上意於是馬幽都欵塞嶧尼稽額南淨炎

海西縛鎮臣之不法者四尼君長交臂而嚮屏息而趨
顧百粵邈在西徼深山大澤封豕長蛇獶焉憑藉者往
往而有天子震怒命大中丞吳公授之鉞曰汝其拏戮
蛇豕令深山大澤蕩我王化萬里著編戶唯汝功吳公
受命不半裸遂謀于總督司馬凌公檄府江兵備徐副
使作曰定百粵其先定昭平乎為我調且募向武諸州
漢土兵草薙之以還報天子綏乃會師于李總帥錫下
四屯哨都司韓文啓以偏師十一月克白壁諸巢十二

月克白馬諸巢又克板燕諸巢五年正月克六勒諸巢
斬首四百級俘賊屬牛馬器械稱是上四屯哨參將吳
京以偏師十一月攻福村諸巢克之攻茅花大梁又克
之攻五指巖又大克之十二月取鐵釘巖又取水穿諸
巖取黃竹二巖又取牛棒巖取大嵒巖又取白馬巖遂
入五指二巖乘勝又入五指三巖正月穴地遂五指老
巢斬首六百級俘賊屬牛馬器械稱是餘賊悉奔潰四
沸有司土漢兵俘斬有差露布以聞聖心嘉悅大中丞

晉級一級錫金幣餘並加陞賚司馬氏曰余聞百粵有
五指白帽蓋天險云正德中數攻五指不克嘉靖初白
帽亡功焉乃吳公五月而舉之若破竹豈不以君行令
臣行意振其綱紀通其條貫哉嗚呼深山大澤非真蛇
豕也則吾人也若其奮焉改圖令田里相安妻子相保
以萬世無煩皇帝之天誅無血大中丞之刃豈不愉快
若不悔禍自作不靖是魚游釜也則皇帝之天誅故在
大中丞之刃故在

督府劉公平蠻碑代胡宥

汪道昆

上方以文治治天下猶仡仡然修武功于時北稱臣東伏質凡諸揚波伏莽之屬莫不殄夷自有區夏以來此其極治者也顧惟粵西八寨糾合古田自昔播亂抗威同惡共濟王文成田州之役順道加兵會請告歸疆理未逮殷司徒古田之役許以便宜首傳剥膚次及唇齒其黨陽為悔禍志在捕誅歸我版圖依我成守遵我要束就我羈縻時以東粵連兵不遑窮治其後乘間竊發

益生戎心久之則寨循業寨撫安增八為十躡我障塞
撓我師徒侵我土田禦我道路係累我士女虔劉我人
民其罪浮于古田貫盈久矣上命劉司馬堯誨居督府
張中丞任撫粵西顧御史鈴則以直指按部會武緣上
林告急相與集議以聞皇上端拱而蒞萬方萬方莫不
臣妾蠹茲八寨猶復怙終寇虐且張亟湏滅此而後安
枕本部覆請詔許出師務在破賊安民母或騷動既得
請直指不及代而行督府移駐蒼梧則與中丞合謀而

後決筭在法什則圍之彼其聚黨萬餘人據地五百里
潰而鼠竄難與周防外氏有言雖虎捕鼠必舉全力赴
之一不勝則鼠化虎矣粵西發各部土兵六萬號十萬
簡操募兵二萬分布中堅益以東粵浙兵三營兵足矣
粵西發鹽利五萬益以東粵軍費萬緡食足矣粵西各
除戎器以待用有不足則自東粵助給之器足矣全力
既具社鼠惡用黠為中丞自守下坐制之全勝之道也
中丞謂善遂相與部署諸將兵乃屬總兵王尚文并將

諸部自閩以外悉聽將軍尚方授節在焉不用命者殺
無赦乃檄左參政彭丈質主軍興蕭相國以餽餉尸首
功則參知事有司不辦者坐之法毋絕後車乃分道進
兵畫信地為四部東南則副使陳俊監參將李應祥軍
三里直北則參議姜忻監參將倪仲化軍忻城正西則
副使侯國治監參將于嵩軍夸江西南則參議李一迪
監參將張榜軍上林乃為師期鐸鐸並進則以徂冬十
二月二十日首事迄春三月三日班師乃聚軍吏而申

誓之所不奉詔令而閹及良民者有如此誓既料賊黨
聞風先遁必奔思恩潯州豫檄當路諸屬邑厚集丁夫
以待漏網賊尋至會督府所遣故參將梁守愚部援兵
邀擊殲之既則以北五諸聚落習與賊通畢事而移兵
平之便各部如期而進賊猶設險以距我師我師奪險
先登賊披靡而退收保我師驅鼓深入直搗諸巢巢覆
而奔亡匿深阻乃復申令搜剿噍類無遺北五諸聚落
悉平壹如成算以俘馘計蓋萬四千五百八十有奇其

餘焚巢墮塹殲于不毛殊三千衆盡矣會胡直指代按
部下車而蒞行間軍正論功有差令諸材官咸獻其狀
直指驩然而喜作而嘆曰是役也師武臣力功貶貶足
多要以壯猷壹稟于督府勝算率由于中丞其功上上
在令甲御史不得言境內功宥幸觀厥成敢無辭以徵
後世粵西名山甲寓內願鐫十仞之石以當豐碑宥不
丈將假手于東里往余與聞邦政不敢謂不知兵督府
著不世功非金石何述遂不避追琢大為之銘曰

世祖初載張皇九伐首及蠻方桓桓新建佳兵不刃籍
寇勤王蠕蠕八寨血牙縱目伺我苞桑我師既旋薄茲
負固騎首斧戕舊勲云亡相沿草昧既蕩滋長構亂一
方為蛇為豕為虎為狼賊我藩臣掠我藩帑倍畔天常
厥有古田切近都會其罪彌彰穆考明威聲罪致討爰
整戎行乃詔司徒諫以天網用命者臧狼子野心翻然
革面相帥歸降其往勿追其來勿距恢若包荒譬則吞
舟脫于罿罟鼓鬚洋洋下民怨恣普天樂土胡獨逢殃

帝曰汝誨賜履南服百粵胥匡申命汝任周行問俗其
惟爾良二臣一心遏茲亂略夙夜皇皇彼醜不馴毒痛
有衆擢髮莫詳帝命徂征興師十萬三月聚糧元戎師
師諸將分部其陳堂堂或典護軍或司餉士寔為紀綱
自冬迄春七旬在事不愆于襄繫頸陳戶百千萬計京
觀相望獻捷于庭告于郊廟神貺無疆元老專征宜從
異數以答非常督府不居伊惟聖武三事肅將赳赳腹
心以身殉國驚發鷹揚肉食鄙人錄錄成事寸無所長

直指曰嬉上臣讓善歸諸天王柱後司直惠文簪筆無
善不章誰其銘之折父之亞以光太常

剿平懷集嵩巒紀事碑

管大勲

兩廣故百粵地我國家並建兩省剖土分疆若犬牙然
懷集介封開陽賀間蠻獠錯居而金鶩松柏古城水細
黃沙等峽皆賊巨窟聯絡深埇澗諸巢每一出沒兩
省騷動逞事亡論已隆慶初劇賊陳龍洲夥衆流劫百
戶朱裳死之萬歷以來肆掠獨週越劫西水攻陷坊郭

里擅殺新民羅廷朝阻截賀縣江道罪亡赦歲甲申冬
賊首嚴秀珠車廷惠劉高萬徐廷穩鄭明端歐福正吳
朝海等糾黨三百餘剽寧尚抵下埠衝寨門掠開建蔡
村封川文德鄉戮居民黎世通等據男婦財帛勢猖獗
官兵不能克總旗史二死焉當是時我西粵方大舉府
江賊乘虛流突梧重鎮肘腋豈堪此鴟獍譇張弑獸咆哮耶
懷賀封開梧重鎮肘腋豈堪此鴟獍譇張弑獸咆哮耶
夫主上授節總督正以兩省卒警兵力牽制便調發撲

滅爾乃會巡撫龍溪吳公巡按姑蘇黃公馳奏關下檄
蒼梧兵巡僉事來經濟暨嶺西兵巡副使王泮府江兵
備參政葉朝陽決筭議剿密行廣東巡海副使陸萬鍾
羅定兵備僉事鄭人達挑總兵標下東西兩山精銳三
千名發潯梧參將部兵併歸順都康二土州戍卒三千
五百名分五哨選將轅門咸會梧鎮若聲援西討者賊
不為備以乙酉歲二月二日癸卯銜枚齊發參將戴應
麟領伏虎哨克松柏壠七金鷲三峴斬嚴秀珠原任參

將王如澄領蘭崗哨克古城上下二崗斬鄭明端原任
參將魏宗瀚領石牛哨攻深埇佛萎龐堵諸巢克之斬
劉萬萬原任游擊沈茂領會珠哨攻水細白蓮黃沙龍
塘各諸巢克之生擒徐廷穩原任守備楊壽甫領仇崗
哨攻大灣磨刀企礎諸巢又克之生擒歐福正賊奔崇
崖據險結陣拒敵諸將士奮勇併力仰攻甲辰擣青水
尾丙午奔鏤帽山戊申破飯甑埇庚戌掃大灣山賊披
靡俘斬有差懷集知縣林春茂督兵把截燕嶺三妹等

山生擒吳朝海殘黨竄匿巖谷中甲申下令搜捕悉殲之撫銅鐘牛欄良猺四百餘墾田立營留兵屯守已巳班師是役也擒斬首從賊總八百有奇俘獲賊屬男婦二百餘馬牛器械稱是師行僅逾兩旬衆不滿七千兵無加餉神謀妙算悉稟于督府而批擣之奇戡定之速蓋有莫測其幾微者猗與休矣上聞併錄府江功賜璽書出金帛爵督府吳公子一人晉撫臺吳公祿一級餘將吏次第叙資於是梧郡太守林喬楠同知鄒通通判

李先春劉學恂推官莊敦義請紀其事勒之懷山俾百
蠻廩廩永永向化云



粵西文載卷四十六